

Editor

Caribbean Speed Printers N.V.
Aruba Bank N.V. Acc. #332668
Caribbean Mercantile Bank N.V.
Acc. #23951903
RBC Royal Bank Acc. #1330772

Redactor Ehecutivo

Zulaica Maduro

Redaccion

Benjamin Romero
Nathalie Winterdaal
Leo Maduro
Margarita Els
Nicola Gonzalez
Dino Tromp
Efraim Odor
Fabiola Cardenas

Ehecutivo di Benta

Marijke Croes-Luidens
Mark Gomes
Elly Erasmus

Aviso y Arte

Sandra Loefstop
Lando Rafael
Gladis Palomino-Silva

Administracion

Xiomara Arends (Hefe)
Mariette Engelhart
Martha Arteta de Ariza

Distribucion

Jenny Kelly

Coleccion

Evelinda de Cuba - Tromp

Pre Press

Luis Fernando Arenas (Hefe)
Pablo Libre

Press

Roland Schenker (Hefe)
Omar Ramirez
Martin Boekhoudt
Yair Gambin
Francis Dirksz

Colaboracion

Sharina Henriquez
NoticiaCla
Associated Press
Ret Karibense
Upload Media Aruba
Yakari Gabriel

Afiliacion

Sociedad Interamerica
di Prensa (SIP)

DIRECCION

Weststraat #22
Tel: 582-7800 / Fax: 582-7044
email: noticia@bondia.com
aviso@bondia.com
BON DIA ARUBA

Ta un Corant redacta y imprimi na
Aruba y ta obtenibel di Dialuna te
cu Diasabra. Ningun contenido
por wordo reproduci sin permiso
di Editor. www.bondia24.com

Editorial



Na despedida di un gobernador

Danki pa demostra kico ta un bon Gobernador

Falta solamente algun dia pa e periodo como Gobernador di S.E. Fredis Refunjol yega na un fin. Algo cu nos no por laga pasa sin mas. E 12 aña cu su persona tabata den e puesto tabata demasiado importante pa nos tur como ciudadano y como pais.

Esunnan cu tabatin e suerte di conoce sr. Refunjol desde edad hoben lo por confirma cu, tanto aña despues, talbes un di e virtudnan mas grandi cu e persona tin ta cu semper el a keda e mesun persona: trankilo, respetuoso, sereno hasta. Despues di su carera como maestro di scol el a drenta politica, pero semper a conserva e mesun actitud calmo y sereno. Gritamento y bochincha manera varios di su adversarionan, y lamentablemente tambe su coleganan tabata parce di ta stima, tabata algo completamente alieno na su persona.

Ta p'esey tambe, dia cu pa prome biaha a propone un politico activo como Gobernador, ministro ademas, a yega na un consenso entre e partidonan representa den parlamento. Añan despues e partido actualmente den gobierno ta reclama cu tabatin un 'deal', cu dia mester nombra otro Gobernador, e partido lo a haya e 'derecho' di nombra, dispensa, 'propone' e siguiente candidato. Awor, si ta propone nan kiermen, esey ta exactamente loke nan mester haci, pero esey no kiermen cu automaticamente Hulanda (Reino) mester bay di acuerdo, pasobra na 2004 Hulanda no a traha ningun sorto di deal cu e partido aki, y ta Rey ta nombra su representante aki, y no ta Aruba ta nombra su representante cerca Rey.

Loke ta lubida aki, talbes pa conveniencia, cu no a apoya e candidatura di sr. Refunjol den e cuadro di un 'deal', pero na prome luga, y sin cu mester a bisa esey, cu e tabata e tipo di persona cu e pais, e pueblo, tabatin mester na e puesto di honor ey. Y den e 12 aña cu a sigui el a demostra di por haci exactamente esey, sin kita, sin pone. Principalmente el a gana e honor aki, haciendo loke ta spera di e representante di Rey: actua mescos cu e Rey, y esey ta implica cu e no ta papia ni discuti nada publicamente. Den su funcion e ta intachabel y ta e politico (ministro) concerni ta responsabel. Cumpli cu e deber ey no ta solamente su tarea; e ta depende di esunnan cu ta bin na su despacho, cu nan sa di respecta e 'regla di oro' cu loke ta discuti eyden, ta keda eyden!

Grandi tabata e decepcion, y hasta rabia, cu den e sucesonan di juli 2014, hustamente e

persona cu, banda di e Gobernador, mester ta un ehemplo pa e ciudadano, a comporta su mes di un manera totalmente bochornoso, saliendo pafo gritando den microfon, cu 'el a faya mi, no un biaha, sino tres biaha', tolerando un situacion di disturbio, menasa y ofensa contra e persona cu e como ministro presidente encarga cu orden y siguridad publico, mester a defende y proteha. Pero e persona Mike Eman a duna prioridad na su deseo como ciudadano individual di bay dirigi un demostracion contra Gobernador en bes di asumi su responsabilidad y de paso respecta e regla di oro ya menciona. E dianan cayente di juli 2014 no tabata solamente dia di gran tension, nan tabata tambe di gran berguensa pa e ciudadanonan cu si tabata consciente con realmente e conducta di nos lider di gobierno mester tabata.

Y den tur e desastre aki, kico Gobernador a haci? El a djis haci su trabao, ni mas ni menos, mantenendo un silencio absoluto, ni kico a sali den publicidad di boca di otro nan. El a mantene su posicion como representante di Rey cerca nos, cu no tin nada di comenta den publico, punto. Y de paso lagando e gritamento na esunnan cu no sa con comporta nan mes... Pero pueblo no a keda sin reacciona. Mirando e grado di insulto y desorden den porta di su oficina, y e liturgia di banda di autoridadnan di Reino pa actua, a cuminsa un accion di firma cu lo keda den historia como algo unico. Ban spera cu esey keda asina tambe.

Pakico nos ta trece tur esaki dilanti atrobe? Pasobra tabata e momentonan mas clave (y doloroso) den e añanan cu e Gobernador aki tabata den e puesto. Pero tambe pasobra tabata e momentonan mas educativo pa nos tur como ciudadano, encuanto con nos mester mira e puesto aki, no e persona, y mantene e respet debido pa e persona, ni maske bo no ta di acuerdo.

For di comunicado di prensa di gobierno reciente nos ta comprende cu tabatin un despedida ameno cu Su Excelencia, unda hasta a papia di 'amistad'. Atrobe, no ta e Gobernador a papia. Laga nos spera cu ta berdad. Nos ta biba den un luga chikito, den cara di otro. Nos ta desea nos Gobernador, como ciudadano comun y coriente entre nos atrobe, tur exito den loke e ta propone pa haci y nos ta yama bonbini na su sucesor. Danki pa corda nos di ki material un bon Gobernador mester ta traha.